

四庫全書

集部

欽定四庫全書

集部

明文海卷一百

詳校官編修臣錢樾

主事銜臣徐以坤覆勘

總核官庶吉士臣倉聖脉

校對官中書臣王家賓

謄錄監生臣李敷源

欽定四庫全書

明文海卷一百

餘姚黃宗羲編

論十七

本治上

黃道周

為治而不明王道述禮樂以視天下其猶社與社者蓬
躉而食擇棬而去乾餧集詬以為情實故天下者非沿
俗之所能治也沿俗之治循衣而坐大問車馬小察雞
豕有或啟口序先王之道則必以為朽翫決笑而去夫

先王者而皆草野耳食不試之士則為決笑宜爾先王亦嘗坐明堂立表懸象垂百世獨以其言為過者何也古昔聖賢咨嗟詰告動必曰天天者聖賢所以明人示有尊也人君之尊于人無上以為無上之尊可立象不可以施化故為之天地社稷日月山川四時之祀以致其齋邀引其卷曲又舉勝社之嗣簡碩德之彥體近意匠以為之賓為之師言立人者承天則夫婦兄弟朋友之倫未均廢也詩首夫婦春秋首兄弟書首君臣其意

亦自朋友取也唐虞之稱其臣曰隣曰股肱殷周之稱
其臣曰友邦曰甥舅伯父叔父以為天子者尊不絕上
貴不絕下尊絕上則奸桀生心貴絕下則忠讜不効故
為天子者有一德之朋有壽人之朋有燕及之朋天子
見一德之朋差軒授几伸玉于俯紩玉于仰言論亹亹
先引而後竟見壽人之朋侑飲而尊舉劎首直奧絢屢
不齧言論加煦後大而先細見燕及之朋離門而御鐘
鼓北房而進琴瑟修職陳藝油油而退凱凱終日天子

有此三朋者而後見人所祇受于天有其等級有其德
慧有長不敢傲才不敢肆而後知人所立體于山川耀
精于水火參差相式光景相避而後其體肅其性理言
動以時和敬以立而後以為禮樂以郊祀天地及其宗
廟山川帥農祥蠶室之作辨朝聘會同之事臨辟雍檄
詩書旌賢黜奸章內別外而後淫聲不蕩炫舞不飾器
物有度章采有制而後農守其畔士安其業內外邪偽
上皆知之上訊不煩而下白其式夫如是而後先王之

道備舉矣先王之道不舉而謂天子無朋禮樂世廢舉之則為訟藪者此大誣民不可不別也故夫婦兄弟朋友此三者之倫自天子博不自天子薄也天子之動心敬天敬天而後敬人敬人而後可阜萬民而致百神故言朋友之倫于天子而絕者猶挈瓢之民傲帝以為無涉者也君臣之倫通于絕域朋友之道喻于極貞火上于天其勢太孤以宥天下謂之大有大有初九害生無交上祐于天故友者佑也畜者孝也兩者道之至大者

也雲興于中而山畜之本天之氣而以奉天謂之大孝
天為至剛昧晦其精借日麗暉為之大有故大有者明
堂之義大畜者封禪之道也古者天子封禪必在介丘
之下所以明天之所封培嶢無增也故就壇以示卑夫
有聖賢之德在于下位累冕不益貴徒跣不加賤則天
子齒遇焉藉茅而承之是石闇鄧林所致其風雨也天
子必與聖賢競貴則暴悖梟鷙者必與天子競位是以
天地交閑則沴厲作彗孛雜見陵谷顛變濁者反清澑

者反突高者反下直者反屈故天子之稱臣妾天下以為大奉則可以為大取則不可也天子而敬天地禮日月祇事宗廟則必敬其夫婦天子而事山川柴望祭脩告五禮六帛奉五嶽四瀆社稷鬼神則必敬其朋友子弟明王之以孝治天下也不敢遺小國之臣而况于公侯伯子男乎故臣妾天下者天下奉之以為敬非以為傲也古之士貴故天子與貴今之士賤故天子與賤貴不必人益賢賤不必人益愚物簡則與貴物多則與賤

古者王后甚辨屏宁甚設陰德所治三妃九嬪七十二夫人八十一尚御凡百二十人陽德所治公卿大夫士之數如之倍長而三又倍而六象天地之候晝夜之策繁數極矣以故其晉接易周笑語易洽情貌通而施化一邪窶不生視聽不惑今内外所治動數千人冠帶之倫日棄職事朝夕過從折百分之一有終歲不得名狀者以故湫陰涒于內愆陽曠于外灌翳蒙叢不可得而材也不可得而材則蠹生其中蠹生其中則醜竅而瘡痏

天子于是謂是可賤者簡眠而賤之輿不為下伏不為
起獸豢而鳥視其臣下又無有蹈古之志拔身之能其
所事者不過與輿臺刀筆同事其所誦說則自貂璫女
史老故振兒勝側理者皆足以治之自是而乞言齒胄
燕召坐論游豫封間之禮皆絕也禮絕而後樂熄樂熄
而後王道不作故鹿鳴之禮廢而鶯鶯之刺興伐木之
禮廢而頌弁之詩作蓼蕭之禮廢而魚藻之刺興湛露
之禮廢而采菽之詩作菁莪之禮廢而匏葉之刺興此

五詩者皆所以刺禮樂之不興恩澤之不降君臣之誼衰而朋友之道絕也聖人者灼其大原故要于和敬以為禮樂之本見其夫婦以為天地陰陽日月宗社見其臣友以為五嶽四瀆鬼神山川剔擢内外涓濶而慎采以澄其耳目一其心意故蒼蔚之氣清則好我之情浹好我之情浹則順信之助生順信之助生而禮樂可作王道可舉矣故為治而不明王道述禮樂以治天下猶以手絜海岱而自為立其徑率也

本治中 黃道周

為天下有序其條而貫之有數言之則以為常言不言
則購天下無言之者序何別曰遠近內外數何貫曰禮
曰政曰刑曰兵兵者試于遠外以治邊陲而邊陲非兵
所能治也凡天下之數舉近而御遠詳內而靖外邊陲
不治責畿輔畿輔不治責宮府宮府不治責黼座黼座
治而後宮府治宮府治而後畿輔治畿輔治而後邊陲
治此數者雖變天地不能易也今曰邊陲不治天下言

者宜釋官府而談邊陲唯邊陲之言則聽不邊陲之言則罪嗚呼是豈嘗察于本計也哉古者天子以疆圉之事託牧伯徵發期會不越其疆大司馬致郊遂之衆車萃屬甲不及侯甸天子穆然執和鬯之柄公卿百執舞羽總干不改其度故其君不震小人不囂是非奸慝無由而作今一方有事則動天下而營之表裏相激主客互射狡黠樂動以為朝夕故有五萬之師千里之役數年不決則反舌寄頸相靡于道矣夫火發于山藪之內

百夫千指虞者以為宜獵薪者以為宜炭田者以為宜灌盜發于廄室之下則門者不及伺苟者不及鑰宵飲迨旦而後相愕也故禍患之生不在言者而在不言者邊陲之失非不言之禍而無本言之禍也故曰什耦而射狸首非虎也磔狗而譟儻鼓非鬼也使禍鏘之動而皆集於羣言之穀則千夫閑市無有覆國者矣三正以來七代二十五氏喪敗相起坐邊陲者十不得二總其巨較皆以宵小權奄構于內而後邊警寇攘來于外宮

府先弊而後畿輔不理畿輔不理而後州郡攜志州郡
攜志而後嚴閼重鎧不足恃故奸賊之來不于所甚較
而于所甚諱也甚諱之始必始諱內諱內者賊在于內
內究不上聞久宿而潰于外潰于外而後諱外諱外者
賊盛于外外攘不上聞驟至而噬于內天下有此兩諱
者則肘足之地有萬里之蔽萬里之寇發肘足之際矣
故人臣之事其君君之事于天皆前而自相名也自相
名者以名己之無所諱可聲應而治之故呼干以為之

干呼戚以為之戚聖人用之而皆有所不樂呼管以為
之管呼籥以為之籥聖人樂之而皆有所不蕩自筵几
枕簟箕帚揭之彙則亦維所自名也名有所從入彙
有所從出弓矢之彙出管絃鎗劍之彙出刀筆戎馬之
彙出狗彘易種之彙出蠻髦咬骨之彙出讒刺邊警寇
攘之彙皆出于宵小權寺聖人以為是皆不可諱不可
諱則人皆知所防外而慎內故聖人之道貴審其所從
出審其所從出則本道而末不害也兵之本出于刑刑

之本出于政政之本出於禮紳冕而救鬪此世所謂濶
懦也而衷介之士能使人益鬪不能使人不鬪道出于
衆競之路勝敗爭半者則聖人不由焉使聖人而舍堂
陛守邊陲其道亦不過戰必勝守必固而已即累世無
百年之治啟高宗皆用之矣而天下不悟者人皆惑于
標害而救于急搏以為千里之治不可以坐制也夫日
月星辰山川之眚其于人不知幾萬里之遠也就而救之
絲窮鼓弊灰盡埽敗羣國人而哭之無濟者聖人坐明

堂發言而善則眚去而沴卻即不為郤亦不為害聖人之坐此五步之內耳夫五步之內豈濶于蒼青之末哉以為氏本所在精曜與宅故其行不馳疾不速今曰邊陲事遠則宜言之堂陛事近則不宜言之邊陲事急則宜言之堂陛事緩則不宜言之信然則以為堂陛之患細於邊陲邊陲之禍急于堂陛也是未為本序也古之聖人日是訪問以救己過瞽史鞞鐸不離左右其公孤百執補闕是思讓才而授任勞而處其精者存于果恩

其險阻易簡制服之數皆存于國邑故聖人之治常若不憂邊陲者而邊陲無釁則聖人所以治之有道也道者知物之所從出集近而馭遠外若甚糲內有餘故有道之人不急鬪人有道之政不急鬪政有道之人豢士以明禮之醑秣馬以芻靈之藁繫敵以綰璽之組有道之政輶一食而軍士宿飽折一券而匈奴解甲夫豈為誕說哉齊莊公楚威王猶未及于中古也一戰之覆邊境薄削反而治內弔死問生哭大夫之廟立百姓之社

弛酒卻肉三年而天下畏之霸者成喪者復夫差主父
者天下之強君也威立于絕漠厲馳于上國乃教羣臣
曰內治之道吾既聞之矣其不足以包諸方兼齊晉者
勿告寡人也自是多勿告者宰嚭李充因以拔臂探其
內白起伍胥因以盜足取其外故夫耀火之蟬外眡取
室之賊外譟多禁者竒喪惡聽者多餓今不知禍敗之
所從出條貫之所組絡緩急輕重之所救濟但曰邊陲
之事則言之非邊陲之事則勿言之是豈嘗察於本計

也哉聖人之臨天下懸衡握斗以為物數官府取萬畿
輔取千邊陲取一焉詩書所稱成敗之源禮樂取千刑
政取萬而兵取一焉一握之樹一畝之稻而皆有數死
螟蜮蟲賊死之翕陽沴陰死之斥鹵沮枯死之稂莠宿
莽死之雞豚搔聚死之縱此數死而獨輟食以論刈獲
之盜競勝不解毛髮相猝不待疾風飄雨而豐本美蔭
已蒙然穢矣故錮四達之聽禁密勿之告設一切以排
衆說者必有甚諱隱惡生焉不可不察也

本治下 黃道周

然則為天下者慎無諱而已諱在內賊則在於內諱在外賊則在於外奸宄竊國必大局限而多舉諱大局限而多舉諱者佯為恥慎以閉天下使天下忘禍而易過世之寡識者既樂於自閉又以為國慝所在重言為好蓋自是賊滿而莫之敢告也古之天子簡處而壹治壹巷寢室達于日月應役之冊舉指可數若是其所露索者亦亶矣猶自以為幽翳四聽而八視惴惴焉廷處而

號衆若行窺竚之索其膏火也今楯陸之內盤泉桓淵
動千里數能含雲霧致霜露者蹠足而至若是即有不
測龍蛇雜興未可知矣而又重其扃鑄使千百人擁之
一人獨閉而卧之猶自以為安處故今之為宅中者宜
賢于古之為宅中者也古之宅中者以一人治數十人
以為不足又使數百人外視而正之今之宅中者以一
人治千百人以為有餘矣又益之以虎豹龍蛇之囿故
古今之賢聖與其道術各相反也古之嚮者趣以明今

之嚮者趣以幽古之植晷測以南今之植晷測以北夫
非其道術之反則必有陰說而亂之者知其陰說而共
與諱則是隱亂也知其隱亂終不可諱而且不得不諱
之則是無術也古之為術者規弦天地而始于日月日
月者萬物之所相見也聖人之道欲使萬物皆見之故
晝行而著日月夜行而著星辰窺牖而杓太青俯水而
鑒大晶包陽不見則其道必戰故聖人之相天地謂與
之為明不與之為冥萬物之貴聖人亦與其明之不與

其冥之也廣陰之下盤陸之底日月則亦間照焉積羽之西扶桑之東祥雲甘露則亦間被焉然而萬物不往者以為彼此不相見則光耀憲霧與之俱失故聖人之賞民道民而賞之其罰民道民而罰之故喜一人則曰天子喜也無曰誰喜者怒一人則曰天子怒之無曰誰怒者天子之喜怒賞罰見于天下則其不喜不怒不賞不罰者亦見于天下喜怒賞罰不見于天下則一人隱志天下皆意之賞一人則曰誰喜之也罰一人則曰誰

怒之也夫一人之喜怒而天下以為有代喜怒者則雖
耀佩鑑鎬刀鋸戶據人之項徒足以失柄無顯威于天
下故君子之為法也亦使萬物各相見也萬物不各相
見而日月常見萬物日月常見萬物故萬物之怪皆出
以示人萬物之怪皆出以示人則人皆知其祟不受其
禍故聖人之為鼎所以使物之祟出相示也魑魅魍魎
雖甚魑魄其種類亦各相美好也出而人醜之雖甚鬼
情亦自以為忸怩聖人以為知此者可以治天下矣故

其治物也以鼎治人也以鐘鼓治物者隱其情而見其形治人者隱其形而見其聲見其形則天下無遁情見其聲則天下無遁形聖人以為知此而天下之數可義起矣今曰見鬼物者必死量聲而度其形者不祥則是天下之物皆相與諱也天下之物皆相與諱則彊者橫口柔者閉齒喜怒賞罰明或竊之而目相視明或竊之而目相眡則殆矣天下之殆皆始于有所諱而終於不可諱豎牛之禍孟季氏皆知也以為告之則憂二子又

不信於穆叔公子成之怒李兑氏知之也禍未發則不敢正已發而與其事則不得不為賊故賊有發于慮禍討不討而皆為賊者季氏李兒氏也太宰嚭爭霸於晉勝之而不居不為不智也李斯請罷阿房減轉作戍邊不為不忠也以閑其內賊而憂于外其過愈于賊故賊有發于據寵告不告而皆為賊者宰嚭李斯是也韋匡翟蔡襄衣雅冠唯隨中書子文子夏棲遲五侯之間大臣寃而不能白權幸移而不能諫卒以覆國身名俱喪

故賊有發于保身過無過而皆為賊者韋匡翟蔡子文
子夏是也此數子者其初皆不甚罪也以其中有所諱
始諱之而卒不可諱故不可諱者皆歸焉故鼎鐘鼓者
聖人所別鬼神正告于天下也聖人為鼎而因以為斧
鑽為斧鑽而因以為較桔為較桔而因以為金矢為鐘
鼓而因以為鞶鐸為鞶鐸而因以為橋梁之木為橋梁
之木而因以為方冊削牘凡此數者皆以其類愈廣而
愈白凡以己自見于天下使天下共見之而已今曰主

希聲則臣見尊數問人則權不神猶曰登高則民散夜
火則矢集此大昧慧不可為天子道也為天子者已銅
于是說不得所以道之其道莫如廣之使見所樂廣之
使見所樂則其勢漸親外漸親外則其數多告而寡諱
矣故古者之為明堂皆在南郊之外日月之壇夾城之
東西講射之地皆饒芹藻環水為澤春秋雨露陵寢自
步大狩之月不廢騎獵凡以抒慮明精宕爽閑鬱鴻幽
清之況與士君子百姓陶其日夕疑難多積則于通達

古今博奧之士必有所取之矣必有所取之而後可與
灼治亂之原證成敗之事吐日月之耀刊鬼寐之怪總
中外之幾商素王九主之務也失此不圖彌陰抱陽暈
生于外賊成于內禹鼎鐘鼓不能正告徒負紳帶而號
虎兕龍蛇之澤以為多諱不已殆哉仲尼曰聖人覩物
而見情愚人見怪而諱名唯其諱名是以與怪為隣而
莫之知也

過臣

楊銘

傳曰忠信重祿所以勸士也三代之君成周以忠厚
待臣故卜世三十卜年七百其收效也為獨遠降自
漢唐以來待臣下之寬厚有禮莫如宋期以養其廉恥
厲其名節以作其忠愛也終宋之世士大夫戴主之馴
輯端謹絕無跋扈悍背之患食報彰彰矣但其弊失于
文弱無斷士之負國也在驕縱廢弛迂徐寡效其矜激
自是者又往往與人主爭勝異同矛盾以國為擲急于
分黑白而緩于課功能怯于當事機而重于畏清議試

以朴忠強幹擔荷勇決者求之仁宗時已不如開雍祥
興時何也守繩墨多顧忌愛穠潔而尚文飾也至鼎沸
于熙寧乖刺于元祐決裂于紹興靖康紛紛皆一夥大
頭巾自相抵觸而人主畧無裁制以故習于尊主而主
威日削講于為國而國勢日虛而宋于是南矣嗟嗟推
彼祖宗崇重士大夫之意豈望其如此耶南宋則又益
偷矣以虛譽為真才以空言為實用持議者以先負重
名而人不敢忤首事者自謂忠勤而全懵機權聚頭磕

膝祇說道理掀唇擊掌橫肆詆訾當時人主亦束縛于
積習恂恂儒嘿曾何有一毫英氣雄畧而號為君子者
猶謂莫急于格心觀蘇雲卿陳同甫之說則槩可覩矣
嗟嗟豈禮士用人道固自異耶國朝培養人才視前代
加隆高皇帝崇師儒洪作育一洗浮靡姑息之弊嚴刑
重典頗加于法外疑其挫折寡廉而臣下習于憂勤篤
于忠愛至靖難節烈震疊千古有養士數百年所不能
得者何也蓋高皇造就之心殷勤懇切如嚴父課子但

知玉成毫無矯飾真足以洞徹簡在而感動人主豈特一時之憤激也哉宣順成弘以來體貌益優文網益闊雖球同時勉輩不無慘楚辱剥而天下皆知奸豎所為非天子意用是愈堅其靖獻之心逆瑾以苛法淫刑箝制士大夫笞謔抄贖死亡狼籍而充焰旋撲正氣畢伸所以累朝人才瑰瑋勲業炳耀擬于兩漢蓋至土木之變宸濠之變江彬之變于王楊諸君子投軀戮力勘定消弭功在社稷食報亦彰彰矣大段本朝立國其脈原

強其氣原厚故人才之挺出也雖入富貴却無豢養氣
雖出經生却無頭巾氣朝廷之待諸臣也其禮甚渥其
法甚明上誠于委任以開功名之路下暢于後效以收
敬事之功此我明用人圖治之大本大端也肅皇帝聖
神英斷大吏時伏斧鑽批鱗間遭訶謹然節目敷大委
任得人諸司凜于奉法恬于仰成所係洪矣晚年深居
端拱外庭日狃嬉窳萬曆丁丑以前救時者稍矯以嚴
飭羣情已竭蹙靡騁數十年來中外無警上下交弛入

仕籍者浮文傲態澤貌枯中進退自由趋避適意壯心
消于逸欲智慧聾于穠華淡泊寧靜目為疎腐惕勵憂
勤惡其害已養交植黨玩歲曷月天下事廢壞至于今
日勢理自應刷振而承靈者頓覺倉皇失措固無怪也
夫才何常練之則出力何常習之則勝不練不習而驟
當驅督如膏梁遊冶之子弟一旦責以負擔穿耳纏足
之婦女一旦迫以奔趨其何以堪宜乎海內興有君無臣
之嘆遂使天子有鄙疑臣下之心因而漸相水火因而

別有信任因而削禮峻法而世事人情愈益繙紛紐解
豈休徵也與以陳寵琴瑟之喻與敬姜勞逸之論推原
觀之草莽局外之見有不能自昧者已

學術
楊鑄

天下有維世之學有濟世之學維世者明天人析義理
金玉其質鸞鳳其羽厚彝倫而美風俗繩異趨以一道
化無此等人則雖已安已治而元氣斯薄囂凌易生矣
濟世者審理亂急事功遠畧長才應機導竅兼文武之

資切緩急之用俾主勢尊于上反側貼于下無此等人
則雖已治已安而龍驤之斧斤弛風波之舟楫乏矣維
世存乎德濟世恃乎才夫謂德之即為才也治平之根
乎誠正也世務之備于經術也比如河之有星宿海方
脈之有素問也誰能外之雖然但窮河源即為神禹但
讀方脈即為倉公乎夫始天下而原自治安也何用贅
為治安惟其智不能自謀力不能自給散不能自聯害
不能自衛然後奉一人以稟仰之一人不能獨理然後

公孤尹牧以綱紀休養之公孤尹牧不皆生而知師心而自用也然後立庠序隆師儒彰典謨以講求薰習之弓旌軒裳以寵拔貴耀之非徒使其自了也蓋欲以用之也一入其彀則曰我已脩稷契伊呂之業卑卑功利固道誼所不出矣夫督功課利有國之急務也不計功將狃敗乎不謀利將恬害乎即稷契伊呂又焉用之夫抱必不靈之術以享人華膾而任勞宣力者一切付之卑小功利之徒何道誼之不恕也竭資異數以得必不

屑用之人而一旦緩急又別從苟且赴功者圖之何養士之無益也又不啻此也迨夫勢機交迫日亂技窮有申韓桑孔所不為者亦攘臂為之而又寡效焉何親切之道誼去若熟而卑視之功利如捕風也夫天下有識時務之俊傑無無實用之聖賢吾固謂俗儒之誤世非獨其見之迂乃其才之短也今天下有能振墮媿破積習實邊儲綠閭左清嘯聚却訐擾俾兵不驕吏不墨士不偷民不流離思亂者乎吾願截格致誠正一半精詣

以歸談理之儒而推斯人為真王佐可已

國是 楊鋗

國是有定體無定局何謂有定體槩言之有以縝密為
是者有以疎闊為是者有以明審為是者有以含糊為
是者有以緊捷為是者有以漸次為是者有以剛割為
是者有以隱忍為是者有以振刷為是者有以因仍為
是者此千古不易者也何謂無定局槩言之有古為是
而今為非者有前為是而後為非者有名為是而實為

非者有常理為是而寡會為非者此當隨變通者也國
是之得或出于英主之獨斷或出于碩輔之老謀或拾
遺于隱君子之昌言或醒迷于虛中者之旁論國是之
失或際夫已窮而不變或狃于積習而苟安或決裂于
書生之執拗或阨奪于重臣之專愎或陰撓于朋黨之
盈廷或紛更于躁夫之喜事此所謂有治人無治法者
也夫謀國之是非與行己之是非大不同矣行己者隨
地而處遵軌而趨成敗利鈍置之可也謀國者君父宗

社之安危四海九州之利害關繫何如而可執邊見徇
恒情畫不足以規益而曰道不計功智不足以紓憂而
曰心不負國然歟否歟常觀古之識時務者如登絕頂
覽方隅飲上池見五蘊因形設阻對症下藥聞見不牽
浮囂不恤擔當不辭勞怨不避固非畏首畏尾膠柱調
瑟者所能勝也是故謀國之要不難于有所見而難于
有所清濇之者持之似有理言之似可用而實謬于時
宜此孔子所謂辨言亂政者也當國者可不審哉可不

審哉

民生 楊鑄

夫民生而須衣食居處有養有終如是而已矣兩愚不能相理兩賤不能相制而後君師官長生焉不過使之并生并遂相安于天地之間而已自世法益變人之術業亦益變而艱辛悽楚莫可逃遁者獨萃于愚賤之民世幸泰寧公私不擾則一時三代也然兵出命以衛農農出力以養兵兵則長征番戍南燠北寒楊柳雨雪之

不禁其悲湯火雷霆之莫必其命但得酣眠甲盾醉卧
沙場已為厚福矣農則萬苦所集萬賦所出終歲胼胝
復有水旱之虞但得不入縣門不見胥吏麥收十斛社
博一醉即稱擊壤矣百伎微營勞筋苦骨亦復如是而
于斯時也堅肥鮮美歌舞游船包苴餽遺窮珍極麗恣
耳目之快渝昧勢理之剥復皆智且貴者之長也皆愚
賤之膏脂而愚賤且甘奉之虔事之而毫不得與者也
及夫驕縱惰弛養成釁孽天下掀然多事則抽丁選壯

橫取酷徵貪墨猾蠹澤吻摩牙公一私十如羣鷗之啄
腐集蠅之嘬血洶洶乎備受剜剥者皆愚賤之民也甚
至魚潰鳥離頽然隄決則潢池綠林之魁鷄鳴狗盜之
流超距裂眦之士又皆策高足據要津乘約肆盈益薪
助火而草菅以用羊豕以驅奴擄劫奪蹂躪焚蕩顛連
而無控告者又皆愚賤之民嗚呼哀哉何斯民之有萬
苦而無一安樂耶孟子曰勞心者治人勞力者治于人
治于人者食人治人者食于人今以勞力者虐于人食

于人者虐人民生之痛其何極之有然則嚴于吏而寬于民非神明仁覆之主先憂後樂之臣不能奮然行之矣

君子小人 楊鉢

自古國家之治亂君子小人平任之何以明其然也易曰內君子外小人為泰夫外者內之對也非無之也蓋理不能無勢不能無也外之者以君子用小人也使君子不能用小人小人且自用矣何也人主所以鼓動天

下者爵祿富貴也使爵祿富貴不足以鼓動之則人主無權矣為人臣者起家而委身一也受事而宣力一也獨于其中競進而寡廉機變而善麗公不勝私義不勝利則謂之小人矣然此等更多才幹之人能自致要津之地醇謹端雅者反易入其彀中誠能駕馭而驅使之涵容而調劑之使之長有所展而勢不得肆則其谿壑之欲未必皆如莽操之無已也而世儒之所謂分別黑白者必不使一小人廁于其間夫既以爵祿富貴鼓天

下而又必欲盡得不愛爵祿不貪富貴之人將使王衍持籌嗣宗理棼楊震孔融供使令而正心誠意之君子僅僅襯衣拱手于廊廟之上此不可期之赫胥無懷之世而以治今天下可乎彼小人者又豈肯甘心自以為小人終俛首以窮死也于是黨益堅隙益開倅門日益廣而世事從此壞矣是國家之治小人猶得分其勞而亂則君子且獨受其責也可勝嘆哉或謂流放竄逐書有明訓不知彼所謂流竄宰相而媚疾者也有才有度

之相其藥籠固已廣矣亦安能使人臯夔而家曾史哉
噫君子不幸而與小人共事駕馭而用之者上也有策
以去之者次也盛怒而胥之嚴局以絕之搜索攻擊以
窮之碗碗然自謂清正疾惡而使小人得肆其反噬是
以名節行誼害人國家者也

憤世 楊鏘

古者英偉卓絕之士負經濟之畧抱治安之志或生違
其時或用乖其器其一段牢騷憤悶之氣不得已寄之

猖狂沈湎悲歌痛哭令人怪惡驚詫意殊不屑而胷中
實耿耿醒醒悲天憫人未能頃刻置念如龐士元阮嗣
宗者流詎可測量乎哉乃若呻吾悅嘿雕肝刻肺以課
鉛槧之業其初念止為一身一家幸而入彀祇同空華
不幸而棄置不過孤負幾句樸檄學子語耳有何瑰異
不得售而往往托之勞人棄婦怨訟咄嗟以為千古奇
阨尚為知類乎或者負愆因悛途窮不返而且謂世路
荆榛浮雲蔽日以被棄之朽質謬托于湘累之瞻懷以

啄瘞之憊骨自比于絡頭之神駿其亦厚顏矣故君子
春不侈榮秋不怨彫憂人之憂而人不知樂人之樂而
人不與非獨見其大者乎

放言 楊銑

嗟乎茫茫浩浩之古今變變靈靈之造化果只有人之
一途乎果只有綱常名教之一端乎古聖人立言垂範
一依于謹確平常者何也蓋身任世道之責如宗子課
家衆第期勤儉克立以無墜箕裘未有教之幻骨肉薄

生聚塵覲鶴結以為高者也如塾師訓童子不過訂其
句讀攷之影倣納于端謹文雅未有與之談出世之旨
離經毀方絕聖棄智以為奇者也即兢兢軌物猶恐有
佻黠之民軼我防維以鑿人渾沌而洪深要渺如天地
與吾心未應有漏之精蘊俱用不着此莊生所謂繙餘
以經世者也惟夫既隱矣既廢矣遁其跡于四民之外
曠其情于萬物之表沕沕穆穆寥寥廓廓不入類以亂
羣不比偶而立異乃始得搜山川自有之山欽奇洩宇宙

莫窮之秘密一家可藏六合靡竟使天下守經之士駭以為怪禮法之儒笑以為支而因用以自晦何也唯駭益徵彼之習于常唯笑益見彼之遵于度而後先王治世安民之大經大法不以一二狂誕畸癖之人病故言放先以隱言廢先以清若夫肆吻而戀世華入羣而畔繩墨謂之惑世誣民可也

管仲 楊鉗

自古雄才實學義正志明建補天回日之勲樹翼戴匡

扶之幟者無如管仲周自昭王南征膠舟不返荆人以
戲弄賊主此時去成康之世幾何天下固全盛也玉帛
會同之邦凜凜于明法勅罰固有數也士馬物力又不
啻十百于江南也吾意普天同仇枕戈泣血汚赭芊氏
以報天子怒猶未怠也乃恬然相安噤無一言是舉中
國俱無肝胆矣不待幽虜平遷而奄奄氣息決不復振
矣獨管子生周中葉為血性丈夫痛心蒿目奮然以匡
救為己任不輕其身善用其主作內政寄軍令生聚教

訓招懷輯睦者二十年人心已孚兵食已足號令已明乃始鳴鐘擊鼓振旅南向問昭王之故當時諸侯一聞此言如夢乍覺方知先朝有此未了之恨楚君相亦相顧駭愕方知先世負此不貸之辜幸事涉久遠尚可謾詞抵塞而齊亦知其極重難返姑聽其納款輸貢俾榮陽上蔡間粗得安枕而後圖東京之方物此其心刻刻在王室也試觀北杏以來諸侯乍信乍猜旋輯旋渙始驚其創咸懼其無成繼幸其成復忌其強盛費幾許圖

回幾許收拾僅乃不負初志英雄敏手結作巍然曾西
何人而卑其功烈吾不知處仲之地任仲之責將何如
揮霍而後云可也夫霸者伯也方伯連帥之長藩臣之
名也商命文王為西伯專征伐豈文王亦雜伯者乎彼
齊之所以明目張胆于楚者固曰周有成命五侯九伯
女實征之楚亦知賜履之有所奉也乃不敢以江漢衡
而謂齊無王何也吾不暇與諸儒辨王伯純駁之微第
借令孔子得志于魯亦不過奉周公之靈申夾輔之命合

諸侯安中國攘外叛尊天王止矣能進方伯一步乎將亦謂孔子為雜伯乎孔子深知管仲之功曰民到于今受其賜曰如其仁如其仁而孟子乃謂聖門羞稱謂王齊反手何言之易也且夫以齊伯則尊周以齊王則代周矣或者戰國之周業已可代而孟子訟言代之則春秋之周尚有可尊而管子極力尊之者未足深鄙也是小子之所疑也後世惟孔明乃心漢室故南陽一晤首談伯業皎然以方伯連帥討賊復仇之義望先主矣必

至丕篡而後建帝號以存祖業其自許管樂豈虛語也哉世儒狃于評伯之文昧于伯字之義動輒曰仲胡不勉其主王噫陋亦甚矣夫直有二伯無五伯則吾鄉用脩翁辨之詳矣

莊子

楊鏘

楊子曰莊周可無著此書也其言根本老子縱橫透徹極性命之致蓋謂機智開則巧偽生而憂患始直欲破澆漓之習解世網之縛而還之混溟之初也然而適所

以開人之機智也孔子曰民可使由之不可使知之蓋聖人喻其意而心愈嘿每每低一著以程世穩一步以立言其于斯世之幻妄冷淡處不欲道破恐賢者得之益任其曠誕不肖者得之愈利其縱恣則非世道之幸也莊生誠欲游方之外守性命之宗何不離言語文字自比于古之沈冥乃昭昭然闡抉太盡徒為後人開一頽惰放肆之惡門戶其尚未至于至人之域乎庾子嵩讀莊子曰了不異人意蘇子瞻曰吾昔有見于中口不

能言今見莊子得吾心矣由此推之不畏人叅不透正謂盡決其防今夫慈母之愛兒子也見其近于井則惕之曰是不可窺其中有鬼見其弄果核則誠之曰是不可衡誤吞之則腹中生樹于是羣兒遇井則遠避手果核則不敢入于口有黠兒教之曰井安得有鬼腹安得生樹為剖析其必無之理又為之窺井衡核以示其無他于是羣兒競效之為慈母為誑已畧無忌憚而溺且噎者種種矣故謂黠兒之言為謬乎非也其愛羣兒之

心大異乎慈母也大抵莊子生于周之末造士大夫無復微敏憂惕之志而聰明特達者遂偃仰放逸以全其天年其書亦氣運使然然其中皆至言微言與六經相發明者殊多非莊子不能著此書吾惡夫機鋒嗜欲橫口填胸而效顰莊子者也

死節論

陳確

嗟乎死節豈易言哉死合于義之謂節不然則固死耳非節也三代以前何無死節者無非死節者故不以死

節稱也三代以後何多死節者無真死節者故爭以死
節市也何以言之生死亦平常事絕無足奇者要善其
死之為難耳子曰志士仁人無求生以害仁有殺身以
成仁孟子曰生我所欲義亦我所欲二者不可兼則舍生
取義是故義可兼取則生不必舍仁未能成而身亦不
必殺也由賜未悟心疑管仲之不死夫子盛推管子之
仁而終黜匹夫婦之小諒孟子亦言可以死可以無死死傷
勇故叅觀一聖一賢前後之言而談死節者可以鏡矣殷

之三仁惟比干之死紂殺之耳使紂不殺則比干終與微箕同賓周室必不死也惟孤竹二子獨能自立名行不食周粟窮老西山故孔孟嘗稱其餓蓋紂雖暴君也武雖聖人也何至使八百諸侯同聲一詞冠帶之倫服膺新命向無夷齊之餓則天下後世尚復知有君臣之義哉此抗古以來一大砥柱也故古今談節義者必以夷齊為稱首鳴虧若二子者可謂真節義矣然夷齊之所以為夷齊只在窮餓節如是止矣不必沾沾以一死為快也使

二子而亦若後世之不食七日而死不成夷齊矣子長
好奇猥云餓死遂使學古之士信孔孟不如信子長不
亦悲乎夫以二子之義即優游西山之下竟以壽終已
大節凜然照映千古何必死蓋惟其不官不死不十亂
不三監非殷非周非仇非后伯叔逍遙西山終老求仁
得仁斯其至也而復何慷慨之足云凡言餓者只是窮
困之詞孔稱夷齊與齊景之干駟相提而論可知只是
貧耳故詠詩嘆美不以富而以異孟子謂七十非肉不

飽不飽謂之餒夷齊之餒不肉食之謂也即何嘗許其兄弟捐軀同殉國難者乎春秋褒善之文舉其大者遺其小者如其餒死則死大于餒不當但稱其餒也即叩馬之諫采薇之歌或傳好事或采軼文何可憑斷且二子自北海來歸已與太公同稱大老後西伯死又十三年武始伐紂則二子者已皆皤皤期耄之年天下而無不死之人二子安得獨不死只不是餒死耳自此義不明而末世好名之士益復紛然致有赴水投繯仰藥引

劖趨死如驚曾不知悔凡子殉父妻殉夫士殉友罔顧是非惟一死之為快者不可勝數也甚有未嫁之女望門投節無交之士聞聲相死薄俗無識更相標榜虧理傷化無大于此近世靖難之禍益為慘毒方練之族竟踰千百一人成名九族堪首何可說哉甲申以來死者尤衆豈曰不義然非義之義大人弗為且人之賢不肖生平具在故孔子謂未知生焉知死今士動稱末後一著遂使奸盜優倡同登節義濁亂無紀未有若死節一

案者真可痛也即又何云三代以前無非死節者耶曰
堯舜禹湯文武周公孔子繇此其選矣生有所以生死
有所以死如四時陰陽更相禪代不爽毫髮正所謂與
天地同其節者乃真死節者也即向所舉箕微夷齊之
節各有攸歸微箕志存宗祀故受封而不辭夷齊志扶
綱常故辭祿而靡悔要之四子易地皆然節如禮節揖
讓進退之不可踰咫尺也節如音節高下疾徐之不可
微芒忽也若繇是推則三代以還死不失節者蓋亦鮮

矣昔人有云東漢之節義不若西漢良有以也古人見其大今人見其小古人求其實今人求其名人心之淳漓風俗之隆替繇斯別矣然則今之所謂死節者皆非與曰是不同有死事有死義有死憤有不得不死有不必死而死要以無愧古人則百人之中亦未一二見也忠矣可謂仁乎曰未知而何易言殺身成仁之學乎古人學道只如布帛菽米日用靡間猶難言純熟今人皆有意求之何易可合果成仁矣雖不殺身吾必以節許

之未成仁雖殺身吾不敢以節許之節也者不可過亦
不可不及故曰中節之謂和豈惟今罕其人子固言中
庸之德民鮮已久蓋言中節之難也

喪實論

陳確

先王之制喪也權親疎而為之斷非以其名已也蓋皆
必有其實焉昔者宰予欲短喪而子罪之齊宣王欲短
喪孟子議之儒者必曰宰予齊宣之非而孔孟之是也
何待言哉非惟然也前古之為母也齊衰杖期近古之

為母也斬衰三年儒者必又曰前古之失而近古之為
得也近古之為適母也三年為生母也期今之為生母
也亦三年儒者必又曰近古之未得而今制之得也于
是聞漢文以日易月之制則羣非之見時宰有奪情起
復之事則大笑罵之嗟乎不循其實而徒悅其名曰吾
寧從其厚者則天下之可非而笑者必多矣雖然今儒
者之所為三年喪吾知之矣書之簡曰孤哀子而已矣
曰制而已矣曰泣血稽顙而已矣而言笑則晏晏也睹

其外貌則儼然衰冠而已矣而內皆纖縞也飲食則厭酒肉也寢處則安房帷也夫且覲然晏會而不知恥也預人間事匍匐公庭而不知其非也有三年之名而曾無總小功之實而猶欲非且笑天下之人可乎哉文帝雖更三年之制然有短喪之名無短喪之實歷觀漢代之主並駕于所生故死而皆以孝謚非苟而已也昌邑入繼以尊則天子也以親則非所生也徒以居喪無禮私買飲食為大臣所奏至不能保其九五之位則漢乃

嚴于喪制非弛喪制者也陵夷至于魏晉一時風俗號
為頽敝而劉隗所奏世子文學王籍之居叔母喪而婚
東閣祭酒顏含在叔父喪嫁女廬江太守梁龕明日當
除婦服今日請客及同宴丞相長史周顥等三十餘人
並應時罷默故謝安石期功之慘不廢絲竹則王坦之
致書苦諫至往復再三故同宴者且不免則喪主可知
朞功之喪曾不得少假則三年者可知六朝之敝也而
猶篤于喪若此則三代以上可知何圖至于今日雖號

稱名賢行若禽獸曾不省察親朋不之規有司不知罪誠舉所謂三年喪者與古齊宣宰予之流絜情而量實已不可同年而語矣又何暇談姚虞稱曾閔哉夫孝者百行之原喪死尤孝事之大一端虧損百行莫救故曾子曰人未有自致者也必也親喪乎孟子曰養生不足以當大事唯送死可以當大事何得不求其實而徒驚其名曰大夫必三年而後服官士必三年而後出試三年則三年矣試回思三年之中服食何如也居處何如

也有不背汗交流錐心刺骨踴躬無地者乎故古之期
母而三年父也非薄于母也父在則禮然也況乎非適
母而生母也然禮雖殺也而情彌篤矣今而不然禮彌
隆也而情則薄矣故古人之于親也似薄而實厚今人
之于親也似厚而實薄古人之喪親也擗踴哭泣而已
今則盛集僧尼伶優以悅耳目夫僧尼伶優之為費非
不繁多也然而未若擗踴哭泣之至也古人之葬親有
懸棺而窆者今必擇地擇年備物而後葬非然則寧久

停而不葬夫擇地擇年備物而後葬之于親非不厚也未若懸棺而窆之可速安親魄也非唯事親為然也古之稱朋友者以字今之稱朋友者曰某翁某老古之于朋友多規今之朋友多頌夫翁之老之而多頌似厚矣然不若稱字多規之真篤也古之飯客者有以蔬食今之飯客者必備味不備味寧弗飯備味非不厚也未若蔬食之可以速飽也古之于妻也嘗三世出今之于妻也舉世無一出不若三出之可以肅違也古之婚者六

禮備然不過數金今之婚者未能半六禮已不下數千
金夫數千與數金之為厚薄易知也然不若數金之遠
時也古之嫁女者荆布而可已今之嫁者必珠玉綺繡
光耀白日迎奩之舟相衡而進而後嫁夫珠玉綺繡
于女誠厚矣然不若荆布之貴德也種種薄俗自謂能
勝古人而已不如古人遠甚吾故欲顛今世之士之稍
知道理者凡事皆求其實毋徒驚其名而況終天之痛
乎哉僕昔年喪父隨俗習非不能循禮真是千古罪人

然每當賓朋讌集之日亦未嘗不良心中發頭面赤脹坐者怪之自後每近先人忌日輒斷腥一月然亦何能贖吾罪之萬一此僕已覆之轍故敢拈示吾同志以為殷鑒嗚呼士苟念此則時蹈冰淵又何敢非笑人之有



明文海卷一百

欽定四庫全書

集部

明文海卷一百一至四

詳校官編修臣錢撻

主事銜臣徐以坤覆勘

總校官庶吉士臣倉聖脉

校對官中書臣王家賓

謄錄監生臣姚元開

欽定四庫全書

明文海卷一百一

餘姚黃宗羲編

說一

醫說

趙汸

醫之為術古之君子類皆能之以為養生事親慈幼之切務非可漫焉譏諸人者是以百家衆技莫得而先焉况人之有身肌膚之會筋骸之束元氣之藏神明之谷經之所起脉之所止營衛周流屈伸聚散與天地比運

氣靡常土風殊理五臟六腑勝負衰旺死生病疾之所
以皆儒者格物致知之目所當必究未有冥然於一身
之內而得為大儒君子者也去古既遠由百家衆技而
上率以空言相師而不既其實惟醫則利害得失決於
旦暮間甚遠不過旬日非可以文辭隱蔽故學者鮮焉
於是判為專門而世俗養生事親慈幼之際亦惟他人
是託其不能無憾者衆矣宋之盛時嘗命文臣知其說
者取前代方劑雜民間所獻遴選而慎存以極謹審之

道業斯術者賴焉奈何庸人謬為增損一以溫平和解掩其所不知而終無益于治療之效漢長沙太守之書觀證察脉以知病之所在而湯劑施焉其道最為精當而近世以來遂為絕學間有剽聞一二曾未得其要領而疏導蕩泄率意妄施戕生人於掌股間而目不瞬其流弊宜有涯哉故凡儒者所當為而不知講則世俗之士將起為之其禍有不可勝言者不獨醫也河南處士郭公子和嘗以其修己治經之餘取張氏書精意研覃

補其闕略朱子為叙以表章之沙隨程公可久亦有論著今傳者罕矣四海既一河間劉氏東垣李氏之說始行東南其遺書未嘗散布者猶有數十種有志者由是以遡長沙之學而有得焉可以養生可以事親可以及人庶幾古者大儒君子之能事不遂泯於方來已乎雖然醫仁術也其體甚大其理甚微其用物也猥而雜其取效也近而著非通乎天地之化辨乎事物之蹟者不足以成其能也非貫乎方論之博極其心思之至者不

足以致其用也蓋必有明敏之資躬質厚之行而又反
諸身以求古人格物致知之所必究者而用力焉使其
心靜而理明志堅而神定然後聖神功巧脉病證治之
說可以意會金石草木形色氣味之性可以類推而又
博濟而匪私善施而不伐庶幾醫道復古者乎予嘗重
有慨於斯切意通都大邑或有其人而未之見聞浙東
朱公彥修親得河間東垣之傳於其師每欲一從之游
亦因循未暇也至正己丑冬來錢塘卧病進士臨川葛

元哲會舍君時為行省掾以長沙法親煮藥飲予且曰
予書佐盧叔原善論醫當使為子發藥既而叔原至按
脉處方乃東垣治內傷法也藥三進而病愈予歸山中
每思叔原不忘辛卯十月予復來而叔原方給事公府
少暇日則指徐君子貞相識因造其家得觀李氏諸書
歎其用力之久客中感疾屢從子貞得藥如鑰透簾湯
沃雪又喜其取效之速聞朱公昔遊會府子貞之先君
子愛慕之因遣子受其說又知其學為有傳書肆老人

陳思復為予言子貞之父孝於親養生送死不墮流俗尤篤友誼則其過庭之間所以為學問之本者必有道矣蓋是數者皆非今日方技家所能備而子貞兼有之且年甚富氣甚清讀書論文日進因之以成其能致其用使得於己者可及於人續子前不絕於後其事甚偉而乃優游獨善使其道闇然而不章予蓋深惜之故具以平昔所見為子貞言子貞倘因予言而有感其必善施博濟不失父師之意有以副交游之望乎

染說

蘇伯衡

凡染象天象地象東方象南方象西方象北方象草木
象翟象雀以為色取蜃取梔取藍取茅蒐取橐盧取豕
首取象斗取丹林取泥水取櫬之灰以為材熾之漚之
暴之宿之淫之沃之塗之揮之潰之以為法一入再入
三入五入七入以為候天下染工一也於此有布帛焉
衆染工染之其材之分齊同其法之節制同其候之多
寡同其色之淺深明暗枯澤美惡則不同其深而明澤

而美者必其工之善者也其淺而暗枯而惡者必其工之不善者也蓋天下之技莫不有妙焉染之妙得之心而後色之妙應于手染至於妙則色不可勝用矣夫安得不使人接于目而愛玩之乎比惟善工能之非不善工可能也夫工於染者之所染與不工於染者之所染其色固有間矣雖然工者所染之布帛與天地四方草木翟雀其色則又有間矣無他天地四方草木翟雀之色二氣之精華天之所生也天下之至色也布帛之色

假乎物采人之所為也非天下之至色也學士大夫之
於文亦然經之以杼軸緯之以情思發之以議論鼓之
以氣勢和之以節奏人人之所同也出于口而書于紙
而巧拙見焉巧者有見於中而能使得了然於口與手猶
善工之工于染也拙者中雖有見而詞則不能達猶不
善工之不工于染也天下之技莫不有妙焉而況於文
乎不得其妙未有能入其室者也是故三代以來為文
者至多尚論臻其妙者春秋則左丘明戰國則荀况莊

周韓非秦則李斯漢則司馬遷賈誼董仲舒班固劉向
揚雄唐則韓愈柳宗元李翹宋則歐陽脩王安石曾鞏
及吾祖老泉東坡穎濱上下數千百年之間不過二十
人爾豈非其妙難臻故其人難得歟雖然之二十人者
之於文也誠至於妙矣其視六經豈不有逕庭也哉六
經者聖人道德之所著非有意于為文天下之至文也
猶天地四方草木羣雀之為色也左丘明之徒道德不
至而其意皆存于為文非天下之至文也猶布帛之為

色也學者知詞氣非六經不足以言文玄非天黃非地
青非東方赤非南方白非西方黑非北方夏非翟緘非
雀紅綠非草木不足以言色可不汲汲于道德而惟文
辭之孜孜乎天台方希直從太史宋公學為文意其年
甚少而其文甚工不惟同門之士未有及之者自朝之
搢紳以至四方之老成凡與宋公友者無不推許之以
為不可及余每過宋公退即希直讀其所為文未嘗不
擊節而歎其有得于文之妙也今希直將歸其鄉大肆

其力于文故因以此勉焉余自蚤歲徒盡心於文章垂五十而迄無成不知自勉乃欲勉希直寧不知愧然希直得余說而及時以道德自任則又何至若余哉此余之所以致愛助于希直也

雷說上

劉基

有夫耕于野震以死或曰畏哉是獲罪于天天戮之矣劉基曰噫誣哉何觀天之局也一夫有罪天將自戮之乎天生民而立之牧付之以生殺之權而又自震以討

焉惡用是司牧者為也曰天鑒于民有隱慝焉人罰弗能及也而震以威之微顯闡幽神道也曰惡是何言也古帝制刑以為天下均故執刑如執權因罪之輕重而前知之又不敢專而聽于天曰天討也夫是之謂贊天地之化育今曰天又自以震殘人罪吾不知天之所自戮者以何等罪乎謂其積之極人不能勝而戮之耶則天下之為人子而不孝為人臣而不忠為人長而不慈為人幼而不恭為人友而不義為人妻而不順賊義而

戕仁縱私而滅公倚勢而行姦乘約而肆淫人言而獸
心陰慘而陽和磨牙吮血股骨刮骨擅威作福殘害正
直而逞于司寇之誅者不為不多矣豈司雷者有所畏
乎乃不一有戮而庸夫爭戮焉使彼有以覩天之意而
謂天之所怒在彼而所容在此也則恃以不忌是天以
震勸逆而濟禍也豈天道哉必不然矣曰然則雷何物
也曰雷者天氣之鬱而激而發也陽氣搏於陰必迫迫
極而迸逆而聲為雷光為電猶火之出礮也而物之當

之者柔必穿剛必碎非天之主以此物擊人而人之死者適逢之也不然雷所震者大率多于木石豈木石亦有罪而震以威之耶

雷說下

或曰雷有神焉有諸曰人曰有之曰然則雷神所為而非氣矣曰否雷與神皆氣之所為也氣也者無所不能為也忽而形倏而聲為雷為神或有或無不可測知人見其忽而形也而謂之神夫神也者妙萬物而無形形

則物矣是故有形而有質者有形而無質者有暫者有
久者莫非氣所為也氣形而神寓焉形滅而神復于氣
人物鬼神或常或變其歸一也曰既為神也而曰不能
戮人罪何耶曰神形而暫者也彼且不能以其形惡能
求罪人而戮之

菜窩說

并序
劉基

菜窩者宗姪彬之所以名其居室也彬字宗文少好
學有識而未用其居在處州府城之東門每求予為

文而恒弗得暇今年予來京師而彬亦以儒士貢為工部主事因戲作菜窩說且以勉而進之云爾

犁眉公謂東門子賤曰子之居東門也井地十畝既夷既壤傍壕為溝倚城為墉藩以枳林緯以蘖場是蓋比如東鍼鋟若攢鎗蛇蝎不能求其縫罅蚍蜉不能為之穴隙也何不壘之以種樹乎又何不耕之以藝稷黍乎不然何不大為之池分北山之泉流以養鱉與魚乎徒何為乎築陋室于其中墾糞土以為壁茨以腐茅蠻蝎

是宅藉以瓦礫羊蹄豕跡與麁鼠為主客平明出門不
馬不車不羸不驢以造他人之廬呼朋命徒左蹠右趨
談無用之空言強相名而曰儒坐視殷賑之腴索為蓬
蘽之區不亦悲乎吾聞燕秦棗栗穰橙鄧橘李梨奠鬱
秦杏周漆柿桃柰楔琬容琰質椅桐枯柏堅續有瑟桂
椒萸榦吐芳馞馝木瓜榅桲諸葛荔荔叢蔓輶輶彼攀
此茹或庸其材或以其實或黃如金或赤如日翹蕭遠
條可蜂以蜜克勤厥營苟獲其一富擬封君受天之秩

范子所至穿池種魚史傳貨殖盛稱陶朱八口之家五
畝之宅牆下裁桑足以衣帛今子不士不農不商不工
綴籍州庠口體不充人皆子嗤子曷不憮東門子賤聽
之愀然思之杳然瞿然而作再拜而怍立而言曰公有
言吾獲矣而吾亦有知焉請以復于公吾將以藝稷黍
乎則古人一夫受田百畝而給今將以五畝為宅矣則
所羨不過二十之一不能以不飢也抑將以種樹乎則
近者非四三年不成不知遠者又幾年乎不可以懸吾

金而俟爨也抑且為池以畜魚乎則我身畸耳貸力於人何日成乎不可以曠吾耽而待汲也今當種菜而鬻馬尚庶幾乎可也夫夫菜也者采也君子之所采也或謂之蔬馬蔬也者疏也食梁肉者之所疏也君子所采而食梁肉者疏之庶幾或者可以裕我矣乎乃往訪于溪南之圃人得膏土沃泉之術蒐四鄙之菜類其族而種之買牛牯一牷三鑊其菜蕪芟去與歲拔其荄杜阜翳籜而燭之穿井於其四隅建桔槔焉灌水有池洩水

有渠或培或滋或叢或竒灌漑攸宜或耘或耔疎稠比
稀慈穉舉肥根莖實羨各隨其時羅之離離鑿之菲菲
未浹旬月而東門氏之童色澤如也貌憚如也窺其園
則鬱鬱芊芊入其門則盎然春溫有酒盈尊他日犁眉
公過焉東門子賤再拜謝曰吾願見公而有陳焉久矣請
已乎東門子賤再拜謝曰吾願見公而有陳焉久矣請
坐于吾廬而為公言之可乎公曰吾願也東門子賤曰
公能悉識吾菜乎公曰未也請之園而言焉曰始吾之

不營是園也漠乎其無思也今吾之既營是園也惟其
所以壯吾址而厚吾生則非一日也天地久其道而萬
物生聖人久其德而庶功成士農工商久其業而百務
貞故植韭以為之君韭者久也所以久吾生也致久必
慎其揆故植之以葵葵者揆也揆得其道則視明而聽
聰故植之以葱聰達則得算多故植之以蒜蒜者算也
算不失家必豐故植之以薑薑則彊矣故植之以薑薑
強也物大彊則過剛剛過則折君子戒焉故植之以芥

芥者戒也戒事者思必苦思苦則毒故植之以荼荼毒
罹于中而用力勤故植之以芥勤極則病故植之以蒲
蒲痛也病之劇也病劇必弱故植之以荏荏柔而弱也
弱則微矣故植之以薇微肝癆也肝微則羸其行故植
之以蕷蕷者僂也愈病必以藥故植之以芍藥藥攻病
不可失其養故植之以鞠鞠養也得其養而後蘇故植
之以蘇蘇則起矣故植之以芑起必慎以保其後故植
之以瓠瓠者護也護不違乎道則難舒而福生焉故植

之以芷芷者祉也引祉莫大乎育德故植之以蓄蓄必
有濟故植之以薜薜者濟也濟自近而之遠自卑而底
高也故植之以崧崧者高也高極必窮故植之以芑窮
慮窮者必早計故植之以蔚蔚者計也吾朝而游焉觀
其菶菶菁菁可以悅吾目而暢吾情夕而游焉擷其芳
而茹其英可以旨吾腹而曼吾齡又可以究吾知而通
物理安得不悠然而永懷怡然而自喜哉夫吾廬窩也
不足以延長者而長者肯臨焉不可以不志請名之曰

菜窩願公為誌之犁眉公大悅遂旅其菜酌其酒書其言而去

南岐癰者說

劉球

南岐在秦蜀山谷中其水甘而不良凡飲之者輒病癰故其地之民無分大姓小家子男婦女老人後生無一人無癰者彼既安於常故而莫醜之亦莫思所以去之及見外方人至則羣小子婦人聚觀而笑之曰異哉爾之頸也焦而不吾類焉外方人曰爾之顙然凸出于頸

者癟病之也不求善藥去爾病反以吾頸為焦耶笑者
曰吾祖然也吾父然也吾家之人然也吾鄉之人然也
烏用去乎哉終莫知其為醜也夫世之人紛然以貨利
病其心而不念其背于道外于義猶癟者不自覺其失
于形矣及見正人君子言不能相入輒羣起而攻之曰
爾何迂也非吾類也噫是何異癟者笑世人為焦頸哉

說舟

劉球

余常觀舟於江湖之上矣其水盛而風烈波濤之勢洶

湧龜鼈蛟魚出沒遠近山川為之震蕩晝日為之昏黑
彼羣小艇方港收岸泊之不暇所謂鉅艦穹艤者且欲
高其牙檣張其帆席當中流冒白浪以上下乎其間萬
斛中藏不見其為重千里倏至不覺其為遠蓋其物大
而具備故雖涉江濤之險而恬若無事而功百倍於羣
小艇焉使其在恬風之渚止水之淵雖有載重致遠之
能且無所施其與衆小艇何辨焉士君子負才美不能
得名于僻壤小邑而能得名于大方亦何異于舟哉友

人羅君勉學工部侍郎寅菴先生從子也以歸安丞得
代來京中外人皆薦之限于常格不能拔調江夏丞江
夏湖廣首邑當水陸四達之衝朝使蕃物往來無虛日
勢倨而政瑣以煩人無樂於官其邑者猶風濤險阻而
羣小艇皆畏縮不敢前也羅君有學問文章而才能優
于已識量高干世猶鉅艦穹艤之為物大而其具備也
往丞劇邑雖喧囂交集其耳疑難充塞其胸必能無動
於懷猶舟之犯險浪而若履安流也事必敏于為為必

果于收猶舟之行愈速而至愈遠也政令之施事業之
就必將異于人而優於人猶舟大而功倍也雖然羅君
猶當端其心以為之舵樹其節以為之檣察於世故以
高下其帆席體乎人情以緩急其繩索然後能有濟也
不然將危于羣小艇焉尚望其功之成乎交游之士皆
贈羅君以詩余獨舉舟以喻之

物形說

李賢

萬物之形不出方圓二者然草木鳥獸之類由天生者

其形圓惟器用室宇之類由人為者方圓兼之大抵出于自然者未有不圓而方者反是蓋圓之出於自然者以有理為之主也理即太極假使有形無不圓者故周子為圖以示人亦必圓其形焉或謂天圓而地方地豈不出于自然乎曰以地為方者據其平言之也殊不知天包于地地如卵黃蓋亦未嘗不隨天而圓其形焉且紙窓之隙初無圓者日來射之其影必圓蓋亦隨日之形耳水波之靜雖曰平焉以物投之其紋必圓蓋一生

水水亦隨天之形耳以類而推之莫不皆然子以見造化之知矣

捕魚者說

李贊

湍之北涯有港焉水自湍流匯而為淵始容小舟入百步外漸濶成潭水深莫測相傳有龍隱其中魚大至尋丈戲躍自得觀之者環步垂涎而不敢犯村有漁者不勝其欲獨棹往捕之飽其船以歸潭亦寂然無所靈異里人見之驚其得太且多爭問所自漁者斬不以告由

是潛持羊酒粟帛以賂之始告焉求者既多告之亦衆
衆懼前所聞猶豫不往漁者利其賂曰傳有龍者妄也
昨者吾捕良久寧不興起邪能我從者與俱于是隨以
往者十八九惟一二熟計之謂龍處必深彼必會其未
知耳其可再乎獨不從已而漁者進從者繼之至潭方
捕之頃水忽湧溢漁者不知所在餘皆驚亂迅雷大震
墨雲匝地烈風暴雨驚電閃爍漁人溺死過半得附岸
者神飛心悸不知言語飲食者累日惟一二不從往者

無恙嗟夫漁之貪利而蹈害也如此人之趨附權勢也亦然方見其赫赫炎炎可以富人可以貴人莫不趨之附之百計效勤以餌其所欲已而天道一還權勢既滅趨附之人逮禍莫逃與從漁者何擇焉惟守道秉義君子能遠之耳錄其說以為士之立身者鑒焉

媒說

石珪

西里之婦有習為媒者三年不成凡為絲蘿之好鮮扣其門金匱蕭索將營他技聞國有大媒氏乃載東帛往

問之再拜而進曰自婦之為媒也膏唇錯牙毀方削廣
意隨波流辨逐風生化強為奸扛卑使尊堅白同異燦
爛紛綸盼移喜怒咳定取予左顧漢勝右麾齊効自以
為術已精矣一行而節應再舉而轍亂久益齟齬行唾
于塗立誓于垣不敢出戶庭者厯寒暑矣將逃之他郊
無復言媒妁事竊聞大媒氏旁通于道大化于藝願進
之階下以祛愚婦之惑大媒氏呼而起肅而入布席于
堂歛神凝思屏左右人三引其端里媒不悟迺閉之別

室致憤發悱明日又問之對曰將無夸毗大繁喻訾失
幾功急大勞反損事圖速成反敗與曰未也趣復入戶
三日然後召焉則見里媒之眉間栩栩然有動意曰幾
矣得之矣問曰女知吾媒有大權變乎曰然吾為女言
之天下之道有經有權聖人用之智者效焉先王之道
至大極遠吾儕巾櫛賤婦矮巷小人安敢議之雖然御
有百車不如詭驅兵有百萬不如反間是故我遇其常
揚兵正旗三戰而勝功非我誰卒遇勍敵我計不展進

與無所得退與後有患彼乃嚴兵以待我亂我乃騰飛
語飾謗書賂左右私名姝嫁怨賈禍以保我軀是以亞
父抑田單走樂毅奔晁錯剖忠反遇禍正反蒙詬必如
是然後兵可制勲可就矣媒有兵道焉女之所習者蓋
尋盟屢講朝平暮成蓐食而更戰既陳而後擊之法也
故口血未乾而盟已解圍柵未備而敵大至矣女所謂
知媒之常而不知媒之變者乎吾為媒三十年矣被選
入官亦復十年吾譽枯楊使為春華毀白台使為嫫母

吾言一出彼各心醉彼執一端我當其會收兩家之歡
得三倍之惠卒有乖迕吾委諸其鄰其鄰不受吾委諸
其親其親不受委諸他人彼自交惡而吾潔其身故吾
老矣國中推善為媒者無以逾我而老婦壯子少孫行
女感我者亦多矣雖然其難易之理成敗之數爾亦宜
知貞女易成冶女難成妍女易成醜女難成禮法家易
成失節婦難成蓋其嫩惡素定風聲素遠幸我輩者雌
黃炫亂黑白顛倒使芍藥之艷得儕行露而升者以有

此舌與齒耳故吾輩者為正人小利為邪人大利而怨不及焉抑吾聞之嫁怨於人其怨將繁賈禍自我其禍始大吾恐明王之世終無貌駕之所姑以卒歲利吾身而已乃更教女為之吾不仁吾不仁於戲大媒氏固不足取然其言時合於道特擇術之不精餉口之欲亟以至此耳以吾觀今之仕者何止一大媒氏哉而顧偃然自以為得計亦甚矣

鼎鑄說

呂黑

楚人兵後徙居故宮之址既結草為廬壘甓為牆壁又
鑿土為池忽獲古鼎量可受百斛上為蛟龍紋下為鬼
物怪狀欵識磨滅不可以考若夏周所遺故物實希世
之寶也中有大小二鐺一折其足剥蝕幾盡一缺左耳
中已斷而未罅雖劙刮下下鱗鱗若痂瘡者如故鼎文
不可以挽乃負二鐺適市售之時亂甫定市之乏金禹
以釿者為多爭欲酬而易之始酬以五十則怒以五百
則笑以五千則又笑且怒有酬以五萬者乃售之歸視

鼎喜曰鑄以如許此豈倍蓰而已哉自吾亂後弊衣糲
食不自裕蓋天以此優我也但未能舉而置諸通都大
邑富貴不須口也於是圖之以揭市門久無有應募者
適有博古君子過焉因請而質之乃笑曰寶則寶矣奈
時何夫狐腋雖珍而襲布帛者衆熊蹯雖美而嗜菽粟
者多龍泉太阿為天下大寶以之補履不若兩錢之錐
鑄固小勺水以沃東芻以然炊之易炎揚之易殼其孰
也可立而待此朝暮之不可無者故爭欲易之鼎雖大

以之熟犀象烹龜則不可投川鷄鳬汁少則熬而不熟汁多則淡而無味將焉用焉楚人憮然自失曰古云才大難為用其斯之謂歟遂歛圖匿鼎以自晦云

移樹說

李東陽

予城西舊塋久弗樹北闢地東隣有檜百餘株大者盈拱高可二三丈予惜其生不得所有種樹者曰我能夠公移之予曰有是哉請試許之予嘗往觀焉乃移其三之一規其根圍數尺中留宿土坎其四周及底而止以

繩繞其根若碇然然其重雖千人莫能舉也則侈其坎
之南稜組樹腰而卧之根之罅實以虛壤復卧而北樹
為壤所墊漸高以起卧而南亦如之三卧三起其高出
于坎柵木為牀橫載之曳以兩牛翼以十夫其大者倍
其數行數百武植于墓後為三重閹歲而視之成者十
九則又移其餘左右翼以及于門又夾神道而南以及
于塗再閱歲而視之其成者又十而九也於是條幹交
接行列分布鬱然改觀與古墓無異焉夫規大而坎疏

故根不離宿土厚故元氣足乘虛而起漸故出而無所傷取必于旦夕之近而巧奪于二十餘年之遠蓋其治之也有道而行之也有序爾予因歎夫世之培植人材變化氣習者使皆得其道而治之幾何不為君子之歸也哉族子嘉敬舉鄉貢而來予愛其質近於義留居京師與之考業論道示之嚮方俾從賢士大夫游有所觀法而磨礪知新而聚博越三年志業竝進再訛有司將歸省其親予冀其復來以成其學且見之用也作移樹

說以貽之

明文海卷一百一

欽定四庫全書

明文海卷一百二

餘姚黃宗羲編

說二

觀陶說

邵寶

邵子觀于景德之陶厯羣工所咸造焉客或嘆曰吁陶之為器其難矣哉方其取土於山猶夫石也碓而粉之澄之以水濾之以渠浥之以甓和之以漿始可以揉而規之又必削其未整焉因以壞者什一磨其未澤焉壞

者什二潤之以膏飾之以采內諸火而出焉壞者什伍其章不壞者璺隙疣玷又什之三蓋自始規而至成器以獻于尚膳其不得與焉者多矣然取土而昇者若干人碓者若干人澄者瀝者浥者和而操者削者磨者潤且飾者納諸火者各若干人凡越工者十而后器斯得其成也其獻之上不過備一御耳為之如是其難而用之不以為異是可嘆也邵子曰是誠難矣雖然吾猶以為易也夫取土而制其質澄瀝浥和而後就規刮磨潤

飾而後就火苟不壞者皆成器矣器而獻之不過三月
則離山野而薦諸郊廟陳諸宮寢祭祀享燕實與有用
焉斯亦異矣視其為之之難亦何負哉乃若君子之脩
身以待用者材以為土學以為確戒以為澄省以為濾
從義以為挹力行以為和循禮以為規研精以為刮師
友以為磨出詞以為潤表儀以為采自試而徵之以去
其疵隙玷疊近者十年遠者三四十年曾不得望君門
而效用焉甚或終其身於山野其視夫陶也又何如邪

寶方陶於人才知其難焉故陶吾猶以為易也客起而謝曰吾聞萬室不足於一陶今乃知其難若是雖然器猶未也請著以為說俾用才者知焉

愚說贈王君

楊循吉

駙馬都尉訓導崑山王君成憲自稱曰真愚子為之說曰今天下皆知愚之不若智矣以愚之名加之其人誠愚邪亦不肯受矣然而愚能勝智智不能勝愚夫何故以吾之智勝天下天下復有智於我者而後吾之智竭

矣而天下之愚者惟無所用以勝乎天下而天下恒不能勝之彼其權謀術數之學有時而盡也今夫終日辨而必歸於默終日鬪而必歸於息夫與人辨與鬪者則人亦必有辨與鬪者起而乘之而不鬪不辨者未嘗有人求勝乎天下之心而天下自然莫能與之角也夫使天下莫能與之角則其智豈不實出乎天下之人而何謂其愚耶故愚者以其不勝勝天下訥而不敢辨怯而不敢鬪而實非怯與訥也乃所以常持其必勝之道者也

故天下之辨者恒遇訥者而止天下之勇者恒遇怯者而止天下之智者恒遇愚者而止愚之勝智不已多邪

書說 蔡羽

草備玄機亦由風氣籀文三變六像具存雖云道藝蓋通神明子雲心畫類別正邪中郎筆論散懷恣情多力豐筋者聖鍾司隸得之韋墓通靈感物者譚衛夫人示以七妙芝象減景鍾索邈步右軍筆陣判將領之後先衛瓘風流亦西臺之高品是故有劍法籐法戈法弩法

點法波法增減法畫斷而脉故連形虛而氣故實右軍
云戈如長松倚谷曲如懸鈎釣水放如長弓發箭收如
虎鬪龍驤是故有立法跪法頓挫法顯異法貫穿環合
曳如杖橫如舟牽如電掣立如鳥卓跪如股疊秀如秋
水芙蓉險如崩崕縣石穩如平郊安步猛如泉濶驛奔
虎嘯而谷陰生雲興而天彩煥是故渾厚而英發清新
而潛括散散漫漫而剛介勁拔趨趨蹠蹠而優閒裕幹
疾者如脫徐者如待竒正不同視前軍之部位東南虛

席效賓主之成章是故踈不容加密不容遣華不可凋
禿不可少筆行而志自從趣動而機不已故曰用筆者
天流美者地力圓則凋勢疾則澁內貴盈而外貴虛
戲聖賢既遠聞見日疎池舊被穿用心良苦意在筆先
山陰之確論十遲五急墨道之要機羊欣親受於子敬
張翼亦幾乎亂真阮研骨力紹之淵微梁武荅書首推
程邈元威論筆先進張融蕭思話不識右軍欣為鼻祖
永禪師遙托僧虔不失家鷄筆待心傳道難俗論文皇

辟以魯廟之器世南謂之神遇無為歐陽八訣發永字
之威儀過庭長譜歎古今之阻絕故三十六法不為贅
懷瓘十體不為侈魯公之所述必待志士高人方明之
授受在乎掌虛指實公權筆諫之要盧雋臨池之訣各
有由來非浪言也顛張得之劖戲狂素亦類驚蛇徐浩
之體氣純白沈傳師之骨法清虛蘇長公論書法謂大
字之難在嚴重結密黃庭堅云自移戎州之後悟沈着
痛快吁代有古今變無終始皇王帝霸各暢厥猷是故

三才一德典章不能掩其盛品彙含曠鬼神不能奪其秀立造化于毫端壯萬古于一瞬非吾所知也

養魚說上

桑悅

思玄先生朝步西昌市售魚苗之盈分者九尾以三投之池沼以三畜之盆盎以三放之澄江祝使赴海投之池沼者數月盈尺歲無加益焉畜之盆盎者數月盈寸歲無加益焉予怪池沼之魚其長不能填池沼而必量之以大小盈盎之魚其長不能填盆盎而亦量之以大

小惟放之江海者不可知而魚之歲益亦量之故千尺
之王鮪生之江而河不能育幾千萬里之鯢產之海雖
江亦莫居之也若夫不拘不礙可大可小喜則勺水為
神淵怒則巨浸為焦澤其神魚乎嗚呼人之於位恒不
能盡填其職而多量之以大小其身心惟涉位而不量
遯世而無悶者乃為至人而推移變化斯不可以常情
測之也

養魚說下

桑悅

予益盎中所畜三魚鰣二仙鯉一時寓目焉忽春雨驟至溝澗皆盈二鰣思欲致身江海噓吸波濤乃隨客流而逝未及澄江水涸石出枕籍交衢焦爛而死獨鯉方圉圉焉洋洋焉吹微沫以自適予怪鰣之長不過數尺其用足充鼎俎而已仙鯉則寄名龍籍乘時變化可以上下風雲而霖雨四海何鰣之不安分而鯉之能自守如是哉古今斗筲之士偶借恩波不自揣量遂謀非望駢首戮於東市者何可勝計而抱濟世安民之具者乃

甘栖遲一丘壑與隱一小官下吏泮蕡以長年不猶是耶

貴行說示門人

桑悅

言行君子之樞機二者孰貴貴行行言之寶也舜彈五絃之琴歌曰南風之薰兮可以解吾民之愠兮南風之時兮可以阜吾民之財兮蒙胞氏之國有臣襲姨剔思玲瓏盛夏置麾車千乘車置輪郭鑄鐵為桔槔上樹八十一扇機括屈卷風韻澎湃其止所草木熛兮激激翬

兮紜紜騰涌幡麾如一然長養不加彼區有南風之聲無其實也妄言為啞妄聽為聾言而無實與不味而聽之者厥病齊同君子聰明之會而自聾啞乎哉君子有三行五性澄心顙瑕纖萌刺擊若讎念慮礪獵固非至德是謂心行履仁服義非禮不動是謂身行非先王之法言不言天妙剖銅霏屑飄冗是謂口行口行純玉猶為崇影矧或純與糅瓦礲耶天下生瀾以國欺國者起兵以家欺家者起訟堅軟之鬪俱慊得雋言焉背行是

以口欺身心不思鬪口而勝之是其人無真氣無真氣
而可以為人乎哉古之聖賢其言載之六經非言也宣
其實也後世之文嫖峙涎括凝躁異格精之者能纂湧
澥礪槐屹長河榮星宿控燄飲沆瀣江淮餐甘露於沃
渚之野騎黃鶴駕應龍下上八紘其妙入無相則神巫
莫窺其密衡婺焉如谷咷焉成陸瀛焉非真燭焉通神
其與呐呐藏脩奄然蔽闕之君子異矣昔周公相成王
致太平開明堂受朝賀鑄京有二眩人獻技一致雞卵

數斛平糲于地躡屣軼盧其上皆訊盤蕩輕穀不驚一
舞干將莫邪揮霍光碎若密雪亂下雲陰天寒夏葉簌
簌乾落王覽之曰神哉技扈之吟鄙人種禾耨壅灌剔
以時禾秀粒如荳穗垂盈尺鄰井之獲莫肩自號神
禾以為妙術亦獻於王王大笑史佚等俱笑周公曰眩
人作淫巧以蕩上心誠蠹政而無益者也扈之吟鄙人
之術行天下其制禮作樂之本歟於是投眩人於四裔
封扈之吟鄙人為保介

降真香說

桑悅

柳之懷遠產香藤葉大如掌多刺鑽蹀絞齒巨材產多于山林紆攣之處歲久色微黃曰藤香或深藏巒崿巨石攫路人跡不到霜饕雪虐積以歲月皮肉俱爛赤心如鐵為之降真真之所成假降久矣天之於人純真竝畀長與世接巧偽日滋欲聰明盡亡耳目俱喪纖假悉屏獨全其天果易得耶嗚呼物降其假其真香于一時人降其假其真香于萬世故曰人為貴安得舉世皆淳

萬物同春入混沌室結鴻濛鄰焚真香會人以遺乎假合之身

用茅說

桑悅

柳州郊野多產茅根株如蛇虺結蟠長沒牛馬困獮獐藉埋伏刦商至冬則盡焚之弘治甲寅二月予奉當道檄築玉融之缺城數百丈且置敵樓百楹於其上與里胥籌其役僉曰未或易致邑瓦工惟三四人瓦難猝具蓋樓合暫用茅時野茅已盡焚各村老弱至回祿虐焰

不及處採取有得蓬蓬勝於蘭蕙予懼新城灰土未乾
忽春雨連綿冀城樓帡幪其頽圮故求茅甚急日坐行
府中聞負擔簌簌聲則喜吾茅將至雖連城之璧化孟
之金不顧易也且是物未火前隨處翳塞最為人所賤
惡豈知丁時之缺亦逢亨運上下貴重之有如是耶嗚
呼茅一也昔馬在野為駁以蔽賊今轉而輸官護城以
禦寇凡物能取其長未必無可用也抑亦僻遠之茅素
不黨惡至是而得顯用歟雖然城樓聳軍民之具瞻不

不得已而用茅茅性易腐其品極卑升之茲樓之上氣象蕭然無以壓人之望是可暫而不可常也因循苟且不急求瓦以易之而以全城專托焉則悞矣昔漢高祖以安劉付周勃勃猶士夫也劉卒賴以安唐太宗取李勣于羣盜因以為將不為無補使居相臣托孤之任安能久而不變哉高祖用瓦太宗用茅故其後之城或固或不固

觀戲說

秦悅

桑先生愛觀南戲不論工拙樂之終日不厭或曰先生
大觀今古而於是戲之觀何取焉曰吾取其升而不榮
黜而不辱笑非真樂哭非真哀而已昔文惠君之養生
得之於解牛張旭之草書得之於舞劍宋元君之畫史
得之於般磚司馬遷之史記得之於遊覽是皆見之于
彼而悟之於此者也予於觀戲得處世之道順逆之境
交於前不為置休戚焉謂非有得於戲哉嗚呼今古能
觀戲者鮮矣

明文海卷一百二